

8

Brjef stjórnarráðsins til bæjarfógetans í Reykjavík um vörutoll af gipsi.

25. febr.

Með brjefi 6. þ. m. hefir bryggjusmiður Guðm. E. Guðmundsson í Reykjavík óskað úrskurðar stjórnarráðsins um vörutoll af gipsi, og farið þess á leit að gips yrði tollað eins og kalk, af því að það væri notað á sama hátt, til þess að klæða innan veggi með því, og til að búa til úr því »kokolit« í veggfóður, en kokolitgjörð yrði óframkvæmanleg, ef gips væri tollað eftir 1. gr. 6 vörutollslaganna, þarsem tollurinn yrði þá tvöfalt hærri en verðið á gipsinu.

Þótt gips sje efni kalkblandað að þriðjungi, og þótt það sje notað á líkan hátt og kalk, til þess að fódra með því veggi, þá álitur stjórnarráðið, eftir að hafa fengið álit efnafræðings landsins um málið, að gips geti ekki komist undir orðið »kalk« eða sement í 1. gr. 1 í vörutollslögunum, og verður það því að tollast eftir 1. gr. 6.

Þetta er yður, herra bæjarfógeti, til vitundar gefið, til frekari birtingar.

9

Brjef stjórnarráðsins til bæjarfógetans í Reykjavík um skilning vörutollslaganna.

28. febr.

Með brjefi 4. þ. m. hafið þjer, hr. bæjarfógeti, sent stjórnarráðinu margar fyrirspurnir um skilning á ýmsum atriðum í vörutollslögunum nr. 30, 22. okt. 1912, og álitur stjórnarráðið að þeim beri að svara sem hjer segir:

1. *Melasse, fódurkökur og fódurmjöl.*
2. *Grasfræ og annað fræ.*
3. *Brauð og »Stivelse«.*

Allar þessar vörur ber að tolla eftir 1. gr. 6.

4. Þjer spyrjist ennfremur fyrir um, hvernig tolla skuli *járnbita, járnbrautarteina, skipsplötur, járnstengur* innan í steinsteypu og *girðingar*. Er stjórnarráðið yður samdóma um, að þessar vörur beri að tolla eftir 1. gr. 2, í líkingu við smíðajárn og stál.

5. Næsti flokkur fyrirspurnar yðar er um *segldúk, tilbúin segl, vaxdúk, línóleum, strigapoka, hörtevinnu, tvist allskonar og sniðið leður í stigvjel*.

Því verður ekki neitað, að segldúk, tilbúin segl og strigapokar sje vefnaður, og þá um leið vefnaðarvara. Þótt hinn hái tollur hafi óheppileg áhrif á seglskipa- og bátaútveginn, verður að fara eftir lögunum meðan þau eru orðuð eins og þau eru nú. Fylgi tilbúin segl að keyptu skipi, þá eru þau tollfrjáls, annars ekki.

Aftur á móti er í vaxdúkum og línóleum, þótt grindin innan í sje ofin, svo mikið af limi, fernis, korkmulningi og gúmmí, eða gúttaperka, að vefnaðarins gætir ekki, og þess vegna virðist ekki vera rjett að skoða þessa dúka sem vefnaðarvöru.

Hörtevinni verður ekki tollaður öðruvísi en tvinni, og sniðið leður í stigvjel er fremur leður en skófatnaður.

Tvistur er baðmullarþráður. Hann er ekki vefnaður, og þess vegna ekki vefnaðarvara, og er hvorki fatnaður nje tvinni.

Segldúkur, tilbúin segl, (sem ekki fylgja aðkeyptu skipi), strigapokar og hörtvinni eiga því að tollast eftir 1. gr. 3, en vaxdúkur, línóleum, sniðið leður í stígvjel og tvistur eftir 1. gr. 6.

6. Þá spyrjið þjer hvort eigi beri að tolla *sag* og *heflspæni* samkvæmt 1. gr. 6, þarsem þessar vörutegundir komast hvorki undir trjávið eða aðrar timburvörur, sem nefndar eru í 1. gr. 5, og verður að svara spurningunni játandi.

7. Þjer spyrjist ennfremur fyrir um *bensín*. Bensín er dregið út úr steinkolatjöru eða steinolíu, og notað mest sem eldsneyti undir mótorá, og er að því leyti notað eins og steinolía. Bensín ber að tolla eftir 1. gr. 1. *Blackfernís* sem tjöru.

8. Þjer spyrjist ennfremur fyrir um, hvernig tolla skuli *auglýsingaspjöld*, *almanaksspjöld* og *annan prentaðan pappír*, sjerstaklega dagblöð, ætluð til umbúða, og *prentuð eyðublöð*. Af þessum vörutegundum verður að tolla auglýsingaspjöld eftir 1. gr. 6, en hinar allar eru tollfrjálsar, eins og bækur og blöð eftir undantekningunni í 1. gr.

9. Þjer spyrjist ennfremur fyrir um, *járnkvarts* og *legsteina*. Af þessu tvennu er járnkvarts tollfrjálst eins og óhreinsað járn, en legsteina verður að tolla eftir 1. gr. 6.

10. Þá spyrjist þjer fyrir um, hvernig eigi að haga tollheimtunni þegar ýmsar vörotollsvörur af ýmsum flokkum koma í sama kassa, eða í kassa með vörotollsvörum eru aðrar tollskyldar vörur, svo sem kaffi, sykur o. s. frv., eða þá tollfrjálsar vörur. Í slíkum tilfellum verður að heimta skýrslu viðtakanda um það, hversu mikill þungi af hverri tegund sje í kassanum, og haga tollálagn-ingunni eftir því, eða rannsaka vörurnar í kassanum, ef skýrsla viðtakanda þykir ekki ábyggileg.

11. Útaf fyrirspurn yðar um enskar smálestir, sem eru lítið hærri en danskar, er því að svara, að smálest er eftir gildandi lögum 1000 kg. eða 2000 pd.

Brjef stjórnarráðsins til sýslumannsins í Ísafjarðarsýslu um flutning þingstaðar.

10

Samkvæmt tillögum yðar, hr. sýslumaður, í brjefi, dags. 22. f. m., og beiðni hreppsnefndarinnar í Mosvallahreppi, veitir stjórnarráðið hjermeð samþykki sitt til þess, að þingstaður umgetins hrepps sje fluttur frá Þórustöðum til Flateyrar, með því skilyrði, að hreppsnefndin annist um, að til verði á hinum nýja þingstað hæfilegt hús til þinghaldanna.

14. mars

Þetta er yður hjermeð til vitundar gefið til leiðbeiningar og til frekari birtingar.